

→ SASTERA & BUDAYA

Kitab Ilmu Bedil bukti kehebatan senjata Melayu

Perkemas fakta sejarah, ciptaan nenek moyang setanding Barat

Oleh Noorazura
+ Abdul Rahman
bhsastera@bh.com.my

Alor Setar

Kitab Ilmu Bedil yang masih dalam bentuk manuskrip, dapat menafikan pandangan stereotaip Kesultanan Melayu Melaka jatuh pada 1511 kerana bersenjatakan keris saja.

Justeru, fakta sejarah perlu di-perkemaskan untuk membentuk


jati diri bangsa yang kukuh, termasuk mengemukakannya kepada pihak berwajib untuk memperbaikkan fakta berkenaan.

Dekan Fakulti Bahasa Moden dan Komunikasi (FBMK), Universiti Putra Malaysia (UPM), Prof Dr Abdul Mua'ti @ Zamri Ahmad, berkata ia menjadi agenda penting pihaknya untuk menyebarluaskan kehebatan warisan bangsa kepada generasi muda berbanding Barat.

Tanggapan salah

"Saya kecewa apabila ada pemimpin menyebut Kesultanan Melayu Melaka jatuh kerana hanya menggunakan tanah dan keris untuk melawan Portugis yang menggunakan senjata api dan meriam."

"Tanggapan itu salah kerana tentera Sultan Mahmud Shah sudah bersenjata api, malah ada ciptaan kita jauh lebih baik daripada Portugis dan setanding Jerman."



Abdul Mua'ti menunjukkan peralatan bedil pada Pameran Manuskip Melayu Warisan Dunia dan Wacana Bedil: Tradisi dan Kini.

"Ini bukan kenyataan saya, tetapi dipetik daripada catatan penulis dari Barat seperti dalam buku *Asia Portugueza* karya Manual de Faria Y Souza.

"Beliau menyebut senjata api buatan Melaka setanding Jerman, manakala semua meriam dihasilkan dengan amat baik dan tidak dapat ditandingi walaupun meriam buatan Portugis," katanya pada Pameran Manuskip Melayu Warisan Dunia dan Wacana Bedil: Tradisi dan Kini di sini.

Abdul Mua'ti selaku pengkaji manuskrip *Kitab Ilmu Bedil*, adalah antara panel jemputan pada wacana terbabit bersama Pengurus Banyan Antiques House Sdn Bhd, Dr Zikri Abd Ghani.

Abdul Mua'ti berkata, penulisan terkandung dalam kitab itu membuktikan orang Melayu sudah arif mengenai ilmu bedil atau menembak yang turut menceritakan cara

pembuatan senjata.

Beliau berkata, dalam manuskip itu juga tertulis cara membidik secara manual yang diceritakan satu persatu. Antara senjata api yang orang Melayu hasilkan ialah *Malacca Musket* (istingu) dan *Malay Matchlock*.

"Jadi adalah salah pahlawan Melayu dahulu digambarkan hanya membawa keris sedangkan sejarah membuktikan senjata utama adalah senjata api," katanya.

Mampu halau Eropah

Abdul Mua'ti memetik Pegawai British di Melaka, Thomas John Newbold dalam tulisannya, *Political and Statistical Account of The British Settlements In The Straits Of Malacca*, "Tidaklah menghairankan andai dapat melihat pendekar Melayu lengkap bertanjak dan berbusana Melayu bersama keris dan senjata api seperti istinggar."

"Ungkapan Edward Monckton pada 1722 juga menyebut Sultan Melayu termasuk Sultan Kedah memiliki senjata api yang mampu menghalau semua orang Eropah dari India sekiranya mereka tahu menggunakan," katanya.

Beliau berkata pihaknya akan mengadakan perjumpaan rasmi dengan kementerian berkaitan untuk memperkemaskan fakta sejarah terbabit.

"Kita sudah menyebarkan maklumat tidak betul dan perlu ada komunikasi warisan untuk memberitahu generasi muda bahawa nenek moyang kita dahulu hebat."

"Kita ada kitab *Ilmu Bedil* yang semuanya lengkap, sekali gus perlu mengemukakannya kepada pihak berwajib untuk memperkemas fakta sejarah. Ini tidaklah bermakna semua fakta tidak betul, sebaliknya ada tempat tertentu perlu diperkemaskan," katanya.